



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Uruguay tir Orsi-i China den
tesendaktep akangshi**

**Liverpool-i defender
Jacquet alizükogo**



VOL. XXIII ISSUE NO. 112 (ADOK 112) DIMAPUR RASEMNÜ (WEDNESDAY) TSÜKLAI (FEBRUARY) 04, 2026 ₹ 5.00

NLTP Act ajanga Arogo aser sorkar piladakja aliba ajuruteptsü meranger

Dimapur, February 3, 2026 (TYO): February 1, 2026 nü Nagaland Baptist Church Council (NBCC) staff den Executive committee züngsemtemi Chief Minister Neiphiu Rio, pa kinungtsü aser MLA tem den State Chapel Hall, Kohima nung Tsüngrem külemogo.

Iba sentong ya Nagaland Legislators Christian Fellowship (NLCF)-i ayongzük aser mendenji MLA Kuzholuzo Nienu liasü aser NBCC president Rev. Achu Chang-i Tsüngrem o jembi.

Arogo aser state sorkar tsüngda Nagaland Liquor Total Prohibition (NLTP) Act, 1989 ajanga tesentaktep mejungi lir saka telok anaprongi NLTP Act akangshitsü aser olemtep alitsü mulungtepogo ta Nagaland Baptist Church Council (NBCC)-i ashi.

Arogoi iba Act ajunga mapa kuma inyaktüsü kechiyong iba mapa inyaktüsü atema sorkar dak dang tashi lir ta bilemer. Külen, sorkari Arogoi amaliteptsü aser Act mapa kuma inyakba nung yariteptsü imlar ta NBCC-i ashi.



February 1, 2026 nü Kohima nung NBCC- NLCF joint fellowship nung Chief Minister Dr. Neiphiu Rio aser tadenertem agiba noksa angur.

Tetsükdaktsü aser tebilemtsü balala ajanga Act mapa shitak meinyakteter. Talisa senotsü aser nübo peria maliba ajanga liquor syndicates anema meinyakteter. Ano lokti nung shilem kari pusema menungiter, tebilemba balala aser tesüiba nung lateta alibatam shitak meinyaktetba ajanga sorkari temulung muluteter asütsü ta NBCC-isa metetdaktsü.

Sorkari mapa nübortem asoshi mapa tajung inyaktüsü ta tamang akar saka NLTP Act mapa kuma inyakba nung tebenja aika alibayong shitak inyaka

mouteter. Arogoibo Act ajunga inyaktüsüba nung akangkanga noktaka lir saka sorkari public tebilembatem ajanga temulung ulua inyaka mouteter ama repranger ta NBCC-isa ashi.

Act tenzükba sülen nungi State Prohibitory Council aser District Prohibitory Committees tenteta meinyakdang ta parnokisa ashi.

Excise Department nung nübo peria maliba atema sasaa bilemer. Yi ajemba ya medical aser moral khuret ka lir aser tesüiba nung NBCC-i iba khuret ya arogo

ajanga inyaktüsüla ta züngshi saka tangbo iba mapa nung lay leadership dendaktsütsü ta NBCC-isa ashi.

MLA temi yi tamajung bener aruba aser tajemertem temang raksatsüba, black-marketing aser syndicates mazüoktetba tebilemtsütem lemsatep. MLA karibo yi noktanga ajanga revenue manguba aser Act meyipa reprangshitsü indang benoka lemsatep ta NBCC-isa ashi.

NLTP Act, 1989 ya sorkar aser Arogo naprongi latetba lir

aser telok anaprongi kasa tebilemtsü khuret abentsüla ta Chief Minister Rio-ia ashi.

Tenokdangba agien yonga mesüra magien yonga legal, police aser excise personnel ajanga mapa tali takangba nung inyaktüsüla aser tashi peria agütsütsüla ta tesentepertemi mulungtepa liasü. Külen, arogoia iba Act mapa kuma meinyaktetba atema sorkar alenbanga mayutsüla mesüra sorkaria arogo nem tai metongoktsütsüla ta telok anaprongi haihaura katapogo ta NBCC-isa metetdaktsü.

Yumnam Khemchand-i Manipur CM inyaktüsü



Yumnam Khemchand Singh

Chugh shima liasü.

"Deobarnü MLA ajak Delhi-i arutsü jaok. MLA 37 prongla Delhi nung senden nung adentsü atema aru. Sendenji Hombar nikongdang amentsüba liasü saka central observer shimba osang sülen sendenji asüng nikongdang 3:00 nung ang amentsü thinenba osang nguogo" ta Manipur BJP lennir kati ashi.

Taoba Manipur chief minister N Biren Singh-ia Deobarnü state nung NDA partners ajak Delhi nung senden ka nung adentsü atema jaokba osang metetdakja liasü.

BJP MLA Y Khemchand Singh ya Singjamei Assembly constituency nungi lir aser tawa tu pai Litan nung Kuki yimtsüngtem semdangba atema tetshia liasü.

Meitei lennir shingaia security tebilemtsü aser temulung malemba agi Kuki nunger aliba tesemtemi moudangi aru saka Khemchand-ibo semdanga liasü.

Arishi küm 58 tain Khemchand-i legislative aser administrative wadang nung aika ajangshia aruogo. Pai 2017 nungi 2022 tashi Manipur Legislative Assembly nung Speaker inyakogo.

2022 Assembly elections sülen pai Cabinet minister ama inyaktüsü tenzük. Idangji pai Municipal Administration, Housing Development (MAHUD), Rural Development and Panchayati Raj, aser Education portfolio tem bona liasü.

Underground rail link ajanga NE ajangzüktsü: CM Sarma

Guwahati, February 3, 2026 (Agencies): Northeast-i linük den sendakteptsü aliba underground rail link ya kanga dang tongtipang mapa ka asütsü kechiyong iba ajanga national security akangshitsü aser connectivity nung timtem malitsü ta Assam Chief Minister Himanta Biswa Sarma-i ashi.

"Chicken's Neck" ta ajaba

Siliguri Corridor temesü ya lendong aitsüsa dang arur aser linük anemertemi iba dak tenük yoka arur. Ajisüaka underground rail corridor ajanga Northeast aser mainland India tsüngda kanga junga sendakteptsü ta paisa ashi.

Prime Minister Narendra Modi aser Union Railway Minister Ashwini Vaishnaw nati mapang talangka tebilemtsü bona

aruba khuret asoshi bilema inyakba atema tenüngsang agütsür ta paisa ashi.

Iba underground rail link ajanga tesentaktep akangba dang masü saka northeastern state tem rongsenketzüng tsütsü tashi aittsü aser senzusenbong ayonga akümtsü, iba ajanga timtem mapang kanga teyari tulu angutsü ta CM Sarma-isa ashi.

SC-i state 12 indang anti-conversion laws reprangdangtsü

Guwahati, February 3, 2026 (Agencies): India kübok state 12-i anti-religious conversion laws yanglua aliba reprangdangtsü asüngdangba Supreme Court-i mulunga agizükogo.

Item ozüngtem asoshi Khristan teloktemi tebilemtsü abener aser parnoki Supreme Court dang ibala ozüngtem ya religious minorities anema lir ta ashir.

Chief Justice of India Surya Kant-i aniba Supreme Court Bench kati Ministry of Law and Justice ajanga Centre sorkar aser Himachal Pradesh, Odisha, Karnataka, Uttar Pradesh, Uttarakhand, Haryana, Arunachal Pradesh, Madhya Pradesh, Chhattisgarh, Gujarat, Jharkhand o Rajasthan sorkartem dangi shidi yokogo.

SC nung iba ken o angadangdang National Council of Churches in India (NCCI) atema noktaker senior advocate Meenakshi Arora-i item ozüngtem ajanga 'vigilante groups' temulung uludaktsür ta toktep.

Item ozüng ajanga tiyazü ken o benoker aser iba nung ajemdaker aibelen mesüaka

nisungtem apur ta lai ashi.

"Ibala Acts ajanga aibelen malirtem dak teka aitsü melar. Ashishitep kecha meliaka, ken o benoktsü akok aser nisung ka aputsü melar" ta Arora-i Supreme Court nung ashi.

Centre atema noktaker Solicitor General Tushar Mehta-i ken o benokertemi ashiba atema kulitem mali ta ashi.

Iba tebilemtsü ya Constitution Bench judgment kati angatettepogo aser sorkari telangzüba agütsütsü ta Mehta-i ashi.

Mehta-isa Supreme Court-i 1977 küm Rev. Stainislaus vs State of Madhya Pradesh atema oshidang agütsüba lemsatep.

Iba mapang judge pungu agi akümiba Bench-i Madhya Pradesh Dharma Swatantraya Adhiniyam, 1968, aser Orissa Freedom of Religion Act, 1967 ji ozüngi melar ta shia liasü ta Mehta-i ashi.

"Constitution nung Arrla 25 ajanga tamangba yimsü prokshitsü temeten agütsüba nung nisung ka tamangba yimsü melendaktsütsü temeten dena mali ta okadaki ashi. Prokshiba tetezü tamangba yimsü

tangatetba aser telatetbatem sangdong dak alaka tamangba yimsü melenba maden ta Supreme Court-i 1977 nung oshidang agütsüogo" ta Mehta-i toktep.

Item onük ajak angadangba sülen Constitution Bench-i tangar ka tamangba yimsü melendaktsütsü temeten kecha agüja mali, 'freedom of religion' ya tamangba yimsü ajak asoshi kasa lir. Nisung kar tamangba yimsü melendaktsütsü merangra, ibaji freedom of conscience den meputep ta Constitution Bench-i ashi.

Constitution nung Arrla 25(1) ajanga nisung ajak nem 'freedom of conscience' aser 'to freely profess, practise and propagate religion' agütsür ta Bench-isa nenshi.

Ajisüaka, Supreme Court-i 2018 Shafin Jahan ken o atema obendanga agütsüba nung 'individual autonomy' shia aliba metetdaktsü. Iba lemtet nung ajemdaker Supreme Court-i tamangba yimsü, kibong akümtsü amala yabo pei nija dak dang aket aser iba asoshi 'individual freedom' tematiba ta Bench-i metetdaktsü.

State nung SHVR 2025-26 kübok kaket reju nem tenüngsang agütsü



Dimapur, Tsüklai/February 03 (TYO): Department of School Education-i Samagra Shiksha den lungiemer Swachh Evam Harit Vidyalaya Rating (SHVR) 2025-26 atema State-Level tenüngsang agütsüba sentong ka Mongulbarnü Morung Conference Hall, Directorate of School Education, Kohima nung ayongzüka liasü.

Tetushi tesemdang Secretary, School Education, Mhathung Tungoes-i iba sentong nung jembidang, Swachh Evam Harit Vidyalaya Rating (SHVR) 2025-26 ya Bharat Mandapam, New Delhi nung July 29, 2025 nü Akhil Bhartiya Shiksha Samagam (ABSS) 2025 aliba mapang semzüka National Education Policy (NEP) 2020 küm pongu ajungba temaitsü liasü ta ashi.

SHVR 2025-26 ya taoba mapang tenzüka aliba Swachh Vidyalaya Puraskar tajungba aser tashi taitba kuma NEP 2020 aser India indang 'Clean, green and inclusive school environment' mangdang den putepa renem ta pai ashi.

SHVR 2025-26 ya

government, government-aided, private, residential, tribal, minority aser Kendriya Vidyalayas aser Jawahar Navodaya Vidyalayas ama centre-i lapoka aliba schools aser CBSE nung affiliate süa aliba school densema UDISE codes amshia school ajunga nung amshidaktsür.

Iba sentong ya ajanga school temi pei sasa asadanga tongtipang parameters trok - tzü, metzü meshiba tesem, sapon amshia teka shidokba, operation and maintenance, behaviour change and capacity building, aser Mission LiFE mesüra Eco Club inyakyim tajungba kumdaktsür.

State nung mürekmejua 'sustainable learning environments' adokdaktsütsü asoshi bendanga agütsür inyakba atema Tungoe-i schools aser stakeholders nem tenüngsang agütsü.

Taruba edition nung school timbai arua shilem agütsü imlar ta pai ashi.

Nagaland tesem ajungalen nungi school temi iba SHVR nungya August 4 nungi September 30, 2025 tashi mobile

application mesüra web portal ajanga shilem agia liasü.

Iba inyakyim nung school 2,553 agi shilem agi. Item rongnung district level asoshi school 51 qualify asü aser state level nung school 20 - Category I aser Category II shia nungi 10 - shimtet, kong category shia rural nungi school tenet aser urban nungi school asem liasü.

Iba sentong nung mürekmejuba, sanitation aser environmental sustainability nung parnoki takok anguba temaitsü top-performing schools nem kulizüing kaket agüja liasü.

Iba sentong ya Joint Director Khriesano Nagi-i anir agi, kong Joint Director Mary Neilhovonuo-i sarasadema liasü.

Shashank Pratap Singh, IAS, Principal Director ajanga iba sentong ayongzüka nükjidong lemstep aser iba sülen Government High School Midland, Kohima ajanga temeja ken ka aten aser school temi SHVR nung shilem agiba video tatsüka sayua liasü.

Rüyosüyi Khüsoh, Additional Director ajanga melepzüing o jembia sentong tembanga liasü.

State nung Birth and Death Certificates tejenba atem special drive ayongzüksü

Dimapur, Tsüklai/February 03 (TYO): State tesem ajunga nung Birth and Death Certificate tejenba online registration aser digitization atema special drive ka Directorate of Economics and Statistics, Government of Nagaland ajanga ayongzüksü.

Iba drive ya February 5 nungi 20, 2026 tashi agütsü aser Nagaland nung registration units ajunga awajemtsü. Birth mesüra Death certificate tejenba (manual) alir temi iba mapang

arua registrars ajanga register süa digitized asütsü ayongzüker, ta sangdong ajanga ashi.

Manual entries tejenba digital system nung inoka tarutsü nung amshitsü asoshi tajungba nung ayutsü, amshitetsü nükjidong nung iba mera ya agir.

Iba inyakyim dak sendakba nung teyari mesüra metetnüba lira, nüburtemi office mapang helpline number 7005404269 nung jembitsü akok ta sangdong ajanga ashi.

NABARD-i Kohima nung State Credit Seminar 2026 ayongzüker



Kohima, Tsüklai/February 03 (TYO): National Bank for Agriculture and Rural Development (NABARD) ajanga Mongulbarnü Hotel de Oriental Grand, Kohima nung State Credit Seminar (SCS) 2026-27 ayongzüka liasü.

Iba seminar ya "Promoting Entrepreneurship and Innovation" omen nung ajemdaker ayongzüker, kong state sorkar nungi ketdangsürtem, Reserve Bank of India, bankers, financial institutons, aser development agencies nungi teshimtet nisungtem dena Nagaland asoshi credit planning aser development priorities indang jembitsü arok sapang agütsü.

Kasa sentong nung State Focus Paper (SFP) 2026-27 saya, koba nung FY 2026-27 atema State indang priority sector credit potential sen 3,088.27 crore asütsü takzüteta lir.

State nung lapoka aliba bank temi Annual Credit Plan (ACP) yanglutsü atema SFP ya kanga tongtipang lir.

State Focus Paper ya NABARD-i block level, district-wise projection nungi asadanga renemer.

Sector shia credit potential asadangba den ano iba document yagisa credit flow nung kongshiba aser State nung credit absorption aser Ground Level Credit (GLC) tajungba kumdaktsütsü mera balala sayur.

Iba seminar tenzüka P. Bulte, General Manager/OIC, NABARD ajanga jembidang, NABARD-i Nagaland nung district 17 atema Potential Linked Credit Plan (PLPs) sayaogo, ta metetdaktsü.

SFP ya NABARD, sendaktepa aliba departments aser banks atema arok teinyaktsü lir, anungi

angattetepa aser mapang shidak nung data lemsatapa inyaktsü nüngdaker, ta ashi.

State sorkar asoshi Agristack ya tongtipangba asütsü aser iba ya ajanga aluyimer nem credit delivery tali agütsütsü, ta ashi.

H. Lalhlipuaia, SLBC Coordinator ajanga 'low level of priority sector lending' indang jembidang, total advances ya shilem 24.81 lir, koba mandated level shilem 40 dang kanga agi tajemba lir, ta ashi aser banks tem dang priority sector performance tajungba kumdaktsütsü asoshi mera tajung agütsü ajungshia liasü.

Sibo Nekhini, General Manager/OIC, RBI ajanga State nung data aliba dak sendakba nung tebilemtsü lemsatap aser State Focus Paper tajungba kumdaktsütsü asoshi data tajungba nüngdaker ta ashi.

Imtimenla, Additional Secretary, Finance Department, Government of Nagaland ajanga credit planning ya State indang rongsenketzüing den lirumedema asütsüla ta ashi.

Conventional agriculture credit alema oa tzülü, süngdong-lidong atemba, shiruru metsüba, agro-forestry aser tekong lu nung rangloksü nüngdaker ta lai ashi.

Orenthung Lotha, Commissioner & Secretary (Cooperation)-i Nagaland Integrated Information System ya data availability atema tajungba kumdaktsütsü imlar ta ashi.

Paisa PACS Computerisation Project kübok terenlok aliba indang lemsatpdang state nung PACS 231 computerised süogo ta metetdaktsü.

Lotha-isa state sorkar asoshi lanur nem skill development agütsütsü ya tongtipangba asütsüla ta shia liasü.

International University ajanga Community Health Camp ayongzüker



Dimapur, Tsüklai/February 03 (TYO): International University, Nagaland (taoba mapang The Global Open University Nagaland ta nüngja agüja aliba)-i community health outreach programme nung shilem ka ama parnok indang Sodzulhou aser Kozabe nung aliba AYUSH Hospital ajanga February 3, 2026 nü angati Health Camp ka Sodzulhou Village Council Hall, Chümoukedima nung ayongzüka liasü.

Iba camp ya University indang Departments of Naturopathy and Yogic

Sciences, Physiotherapy, aser Medical Lab Technology ajanga agi. Iba mapang yimdaklir nem angati health consultations, basic medical screenings, physiotherapy guidance, aser laboratory services agüja liasü.

Iba sentong nung Sodzulhou, Kozabe aser anasa aliba yimtsüngtem nungi nüburtem arua teyari agia liasü.

Nüburtem asoshi iba ama sentong ayongzüka atema Kodo, VDB, Sodzulhou ajanga pelaba lemsatap aser tarutsü nunga iba mesük sentong

ayongzüksü ajungshia liasü.

Vice Chancellor, Dr. Dipak Kumar Shukla-i lokti pela agizükba o jembia aser University nung adademic programmes balala agütsüba indang lemsatapa liasü.

Paisa University ajanga nüburtem asoshi mapa inyaktsü aser healthcare agütsütsü tebilemba lemsatapa liasü.

Iba mesükba angati health camps ayongzüksü jangra aliba nüburtem mesüra yimtsüng temi International University, Nagaland den tongteprateptsü University ajanga metetdaktsü.



February 03, 2026 nü New Delhi nung NDA Parliamentary Party senden nung Ato kilonser Narendra Modi, Union Minister tem- Rajnath Singh, Amit Shah, JP Nadda, Minister of State Anupriya Patel, BJP National Tir Nitin Nabin aser tangartem tangokba noksa nung angur.

India-i Palestine maneni nongittsü: PM Modi

India-US shishilembaba tezüngzüktep atema o lemteptsü ahang

New Delhi, Tsüklai/February 03 (Agencies):

Mongolbarnü Rajya Sabha senden nung India-US tsüngda shishilembaba dak sendakba tezüngzüktep agiba onük nung o lemteptsü takhangba agütsüba sülen opposition party aika nungi züngsemtemi tejashi nung longkak aita senden nungi ayazüka alu.

Zero hour tembangba sülen Congress MP, Jairam Ramesh-i India-US tsüngda shishilembaba tsütsü teüngzüktep agiba onük süoka, 'iba osang ya India sorkar nungi masü saka US nungi mezüng angashir' ta metetdaksü.

House lenir, J P Nadda-i, US Tir Donald Trump-i Ato kilonser

Narendra Modi den jembiba sülen iba osangji social media ajanga metetdaksü, ta ashi.

India nunger osettsüset nung US-i saru shilem 25 agia aliba nungi shilem 18 tashi ajema kümtsüogo. Opposition party balala nungi züngsemtemi iba onük nung o lemteptsü takhangba agüja longkak ait tenzüka liasü.

Opposition aija JP Nadda-i, Opposition tejashi jungkai adok tenzükdar, aser tajung nunga tamajung reprangtet tenzükdar, ta metetdaksü.

Nadda-i, "Ni iba House dang ya züngpong ashir, India-US shishilembaba tezüngzüktep agiba onük nung o lemteptsü aser osang tejangja agütsütsü sorkari melunga lir. Iba dak sendakba nung sorkari sangdong tejangja agütsütsü," ta

metetdaksü.

"Ajisüaka iba inyakyim ya democracy atema majung aser Indian National Congress den INDIA teloktepi tim masüba yimya benshir," ta pai metetdaksü.

Rajya Sabha Chairman C. P. Radhakrishnan-i opposition dang, sorkari iba onük nung o lemteptsü melunga lir saka opposition-i rongrong adokdaksür, ta ashi.

Iba sülen opposition züngsem aika nokdaker sabangleni oa sorkar anema yimyim ayima liasü. Iba sülen Trinamool Congress (TMC) dak alaka opposition züngsem ajak longkak aita senden nungi ayazüka alu.

TMC MP, Saket Gokhale senden nungji maneni amen, ajisüaka pa-a mapang tatsüka dang lirbo ayazüka ao.

Wangchuk-i Ladakh nung tensa raksatsütsü merang: Centre

New Delhi, February 03

(Agencies): National Security Act kübok climate activist, Sonam Wangchuk mapang talangka pua ayuba dak sendakba nung Centre sorkari Supreme Court dang, Wangchuk-i Nepal, Sri Lanka aser Bangladesh nung atalokba ama Ladakh nung tensa raksadaksütsü meranga liasü, ta metetdaksü.

Justices Aravind Kumar aser P B Varale nati akümba bench dang Solicitor General Tushar Mehta-i, Wangchuk-i Gen Z lanurtem dang kimai ayazüka Ladakh nung sorkar anema nokdakang ta ayongzüka liasü, ta ashi.

Paisa, Ladakh ya lendong ataloktsüsa aliba tesem ka lir, kechiyong iba tesem ya kiyonger tsükchirtem den arrtsütepa aliba tesem ka nung lir, ta ashi.

Sorkar tenüng nung jembitsür Mehta-i, Wangchuk ya ozüng kübok apu aser iba inyakyim nungji ketdangsertemi aibelenali, ta metetdaksü.

Pa aputsü atema ghonda pezü jelia pa nem metetdakja liasü, aser pa apuba inyakyim ajakji video agia liasü, ta Mehta-isa metetdaksü.

Wangchuk-i tamalen jembiba o metetdakja SG, Mehta-i Supreme Court dang, pai Arab Spring indang jembisaer Nepal, Bangladesh aser Sri Lanka nung tatalokbatem metetdakja nüburtem dang sorkar anema nokdaksü ajungmesoa liasü, ta metetdaksü.

"Nai Gen Z lanurtem dang kimai ayazükang ta ajungshi. Nai Nepal nung atalokba ama atalokdaksünüa liasü," ta Mehta-i bench nem metetdaksü.



New Delhi, February 03, 2026: India aser US na tsüngda shishilembaba atezüngzüktep agiba dak sendakba nung Prime Minister's Economic Advisory Council (PMEAC) nung chairman, S Mahendra Dev-i jembidang tangokba noksa nung angur.

Tanurtemi yi jemer gari anibaji tsüraburtem khuret asütsü: SC

New Delhi, Tsüklai/February 03 (Agencies):

Anojungi tanurtemi yi jemer gari anishiba ajanga tai maket nisung aika sūdaksüba tatalokba aika aliba dak sendakba nung Supreme Court-i, yi jemer gari anitsü atema temelaba agütsüba atema tsüraburtem nem tai tongloktsütsü, ta metetdaksü.

Tanurtemi yi ajemer gari aniba atema tsüraburtem nem tai tongloktsütsü aser tsüraburtem khuret asütsü, ta Supreme Court-i metetdaksü.

Ajisüaka SC-i Pune nung Porsche gari tsükokba ken o dak sendakba nung tai tonglokja alir asem nem bail agütsüogo. Iba tatalokba nungji lanur engineer ana asü. Iba lendong ya 2024 küm May 19 anepongi 2:30 ako meta ataloka liasü. Arrshi küm 18 majung tainlonglong kati yi jemer gari aniba ajanga iba lendong ataloka liasü.

Justices- B V Nagarathna aser Ujjal Bhuyan nati akümba bench-i, ken o metembangi temerenshi agütsütsü makok, ta shia iba ken o nung tai tonglokja ita 18 tashi jail nung puoka alir asempong bail nung chioktsü tuyu.

Tanuri yi jemer gari aniba miimbangtsü atema tsüraburtemi pei chirnurtem azüji parnok dak mezüluka liasü.

Iba tatalokba nung tai tonglokja alir tongtisang tebu jagi gariji ania liasü ta tiyazü kuli agütsü. Pabo tang tashi jail nung lir.

Supreme Court-isa, tanü-asüng takar tsüraburtemi pei chirnurtem nem mapang magütsüteter aser ibaji menoktsü atema tanurtem nem senotsü aser sports cars agütsür; iba ya tesasatsüka lir, ta metetdaksü.

Kodang tanurtemi gari mekümdangi anishia lenmang nung tai maketertem yirutsüdir/ tsüksetdir iba atemaji tsüraburtem nem ang tai tongloktsütsü, ta SC-i ashi.

"Tsüraburtem danga langkabo ashitsüla. Tsüraburtemi pei chirnurtem mazüokteter. Parnoki gari jabi bener ao. Pelatepbaji gari kera ania lenmang nung nisungtem mesüra sensakertem tsüksetbaji masü. Iba ya tang mezüng ataloker masü. Tensa mapang den apet ozüng yanglutsüla. Tongti aibelenertemji pei chirnurtem nem sen agütsür tsüraburtem lir. Tanurtemi pei chirnurtem nem mapang magütsüteter mesüra sensakmasemer. Ajisüaka tanurtem nem mobile, ATM cards aser gari agütsür," ta Supreme Court-i metetdaksü.



February 03, 2026 nü Anantnag district kübok Pahalgam nung rürjep agi gari nembanga aliba noksa nung angur.



TIR YIMYIM YIMOBILEM (EDITRIAL)

DIMAPUR WEDNESDAY, FEBRUARY (TSÜKLAI) 04, 2026

Temeshiba o Ochishiba na !

Temeshiba o Ochishiba na tsüంగా ya aiben asenoki mebandangteter. Aji oda, Temeshiba o Ochishiba na ya nisung asüంగాbo asenok nü dangbo kasasa amai angutsü. Ajisüaka, Temeshi o Ochi na ya medemdangtsüa makok, tenaji balala, kechiyong temeshibajibo Tsüంగాrem aser ochishibajibo Tsüంగాremi nisung dak nungi imlaba jakla tajung rongnung ka lir. Aji kodang asenoki angatetdir, asenoki Tsüంగాrem o nisung na tsüంగా tebandang tali jangjaa metettsü. Aji oda, alima nung nisungi temeshiba akümtsü asoshi kari kibong makümer aser ano karibo nisungtem alidak nungi pilaa pei kija azüంగాmeyakdak arem nung lia jajar. Ajisüaka, iba jagia nisungji temeshi mekümtettsü. Atangji, nisungi tai meinyaki aser tiyazü mejembii ochishiabo litettsü saka temeshibabo mekümtettsü. Ibayongji, asenok yimten aser lokti nung ajungshitep dang temeshi alitsü asoshiibo majungshiteper saka ochishia alitsübo teti ajungshiteper. Ibai angatettsü atema asenoki Temeshi Lai Apijemtsü Shin 14: 34 nung züంగాdangra, asen Ao oshi nung, “temeshibai kin ka ajungkettsür,” ta shia angur aser English nung, “Righteousness Exalts a Nation,” ta shia lir. Ibaji kodang jungjunga bilemdangdir, ashiko, asenok Ao oshi nung ‘Ochishibai kin ka ajungkettsür’ ta asüంగాbo koda teindangba aser tangatetba süla ta aiben bilemer. Ashiko, asenok temeshibai kin ka ajungkettsür ta jembiba agi, shibabo temeshiba ali ? Aser shibaibo temeshiba kümtettsü (?) ta bilema memeshi, meindang aser ochimashi alitsübajiang tim amai bilema asenok ya alir südi ta sa bilemer. Aji oda, tanü asenoksasa asenok agi nümamedangtettsüsa aser asen mapa nung asenoksasa mulung masütsüsa aliba tensa tia ya asenok temeshi taküm melitetba agi masü saka asenok ochishia melitetba ajanga lir ta asenoki angatettsü junger. Ibaji kodang asenoki angatetdir, tanü asenok yimten aser lokti nung ajungkettsü melen tatsüంగాzükleni aluba ya tanga agi masü saka ochimashiba ajanga lir ta angatettsü, Kasaji, tanü asenok ali rongsen aser temetetba nunga ajungkettsü melen teküpbok jenjangi dang lua lira, ajia asenoki asen taküm meshiteta maliba agi masü saka ochimashi aliba ajanga asütsü. Asenoki kodanga temeshi alitsü memerangtsüla, ajibo Tsüంగాremia meimlar, saka asenoki teti ochishia alitsü merangtsüla. Aji oda, asenoki temeshibo mekümtettsü saka ochishirbo kümtettsü. Temeshibaibo kodanga tai meinyaker aser temenen memenar saka Ochishibaibo tai inyaksüa akok aser temenena menatsüa akok saka mimshia meyui indangindanga nangzüker aser tanaben meinyaksü meranger. Aji oda, asenok ya “Holy” temeshibabo mekümtettsü saka asenok ya “Righteous” ochi aser teindang nisungbo kümtettsü. Kasaji, Laishiba nung Tsüంగాremi kanga mulung lemtetba nisung Yob-a ochishir, righteous, nisung liasüa ta dang shia angutsü. Ashi, nisungi litettsü asüంగాbo Yob-ang temeshi nisung süla ta bilemer. Tanü yangi Temeshi aser Ochi na indang tangatetba ka lemsatepba nükjidong ya, tanü asen kin yimten, lokti aser arogo timtem tia nung lira, aji asenok memeshiba purtem asüba agi masü saka ochimashiba purtem asüba agi lir ta angtetdaksüner. Iba tia tamajungbaji tajungba küma melenshitsübaji tanü asenoki inyaka aliba ochimashi mapatem toktsütsüla, kechiyong ochishibai kin ka ajungkettsür süra, kin ka ajungketnüseta majungkettetbaji ochimashiba ajanga asütsü. Ashiko, asenoki temeshibaibang kin ka ajungkettsür ta jembiba agi, temeshi alitsübajibo tamakoktsü asüంగాngji, asenoki tamakoktsübo memerangdangli ta ser mashimashi alir südi. Mesüra asenok aikati temeshi taküm alitsübaji arogo nung lenir aser tenzükertem mapa ta bilema alitsüa akok, saka parnokia temeshi taküm kabo melitettsü, kechiyong parnokia nisung, anungji Tsüంగాrem aser asenok asoshi arogo nung tenzükertemia ochishia litetra aji teperi, kechiyong iba jagi dang shitak o meshitak na bendangtettsüsa nüchi shisatsü ngutettsü. Ibaji angatetra, asenokbo tanü nungi danga Temeshibai masü saka Ochishibai kin ka ajungkettsür, anungji asenoka asen kin ajungkettsü atema, mapa tasak süaka, ochishia alitsü merangtepedi ta ajungshitepedi.

OLEMSABANG

TSÜRABURICHIRNURNEMMAPANG PERIAAGÜTSÜTSÜLA

~ L. Kika Pongener.

Tanü putu nung tsürabur aikati chirnur kong lir ? Koda alir ? Kolen senzür ? Medemer tajung den medemer asü tamajung den medemer ? School aser College-i shidak aor asü maor? ... ta mebushidangba, oda züba-züba-a kecha khuret makai aliba tsürabur aika lir. Ajiser, chirnur taküm tia teraksatsü ajak raksaadoker külen sasaseta, joko asa-taoi tain kümadoker ano meyiper, chirnurtemi bentsür aruba tebilemtsü khuret agi nenneter shisabulua aliba kibong aika lir. Iba tamakokji jungjunga bushidangra, ibaji tanür tai masü tsürabur tai tuluba asütsü. Tsüraburtemi chirnur mapang shidak nung timi mazüoki zübazüba-a toktsüba agi raksadaktsüba teimba asütsü. Tsürabur aikati rongsen penpua sen-sen dang bushia; talisa, tetsü kati anepdang nungi nikongdang tashi; chirnur nem mapang magütsü ki toktsür sen bushiba, shishilempaba nung dang temulung agütsür jajaba agi chirnur raksadaktsüba aika lir. Kibong karbo jebang-nubang mapang tetsü ka loktiliba aika nung atongoker; lokti asoshi mazüంగాngi senzüంగాng chirnur nem mapang peria magütsüba agi raksadaktsüba karbo lir. Ano kibong karbo tsürabur anaprongla sorkar mapa inyakba agi chirnurtem 'Mini-Kanja' nem dang toktsüba agi jungnuseta raksaba-a karbo lir. Ano tanür karbo tsüraburi senotsü kar/lir ta sur chirnuri meshiba/nungdakba dak talila senotsü agütsüba agi yi-lar aser mozü-lar küma, sen agi taküm raksadaktsüba karbo lir. Ano karbo kibong nung apuani tsüంగాng kati ka hau ta mali, apuani tsüంగాng temeim mekongatoker, tenuk tasen adoker lidipudia litepdang (Broken Family) chirnur taküm raksadaktsüba karbo lir. Yamaji tsürabur tai ajanga chirnur aika jungnuseta yi lar aser mozü lar akümba aika lir.

Alima nung kibong aser taküm alitsü asoshi sen/rongsenji kanga nungdak aser tongtipang lir; saka ano sen/rongsen kisung agia kibong aser taküm ya malir. Anungji tsüraburtemi kibong nung rongsen bushiba luyim dang nungibo, chirnur mapang shidak nung timi azüoka, tim lenmang nung anitettsübaji ajak dang tongtipangba sudaktsütsüla. Kibong aika nung tsüraburtemi chirnurtem dang nungi sen/rongsen bushiba mapaji tongtipangba sudaktsüba agi, sen/rongsenbo aika benden, saka chirnur takümbo kodanga meyanglushitettsüsa raksadaktsüba kibong aika lir. Tsüraburtemi sen/rongsen penbudang chirnur nem mapang peria magütsüba agi raksadaktsüba teimba lir. Ajiser, sen/rongsen bendenba ajunga-to chirnurtemi anak-aoyi küma lalushiponga endokba kibong aika lir. Anungji chirnur mapang shidak nung azüoka tim lenmang nung anitettsü atema tanür nubomajung tashibo; talisa, tetsü kati ki toktsür maotsüla; shishilempaba mapa, senotsü bushiba luyim nung mapang kangabo meintoktsüla. Tsürabur ajaki sen/rongsen dang nungipo chirnur mapang shitak nung azüoka anitettsübaji tongtipangba sudaktsütsüla. Kibong nung chirnur dang sayu-bentsü o ashitsüba mapang tajungtibaji kibong tekülem agiba mapang ya asütsü, aser kibong nung alir ajak külemi ajuruteptsüba mapang tajungtibaji chiyungba mapang ya asütsü. Anungji kibong nung alir ajak mapang ka nung külemi chiyungtsüla; aser tsüraburi chiyungba mapang nungji chirnur nem mapang agütsütettsüla; kechiyong kibong ya kangasa tongtipanga ta tsürabur ajaki angatettsüla. Tesasatsüka, tanü putu nung kibong aika kibong masü 'Hotel' ka dang mesuka; pei chiyungnuba mapang arua chiyunger oadokba aser tsürabur o chirnur na anogo tepiyong nung khen danga tejak mongutepe anogo suidaktsüba kibong aika lir.

(Maneni asüంగాng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüంగాngi angateta agitsü mepishir

Russian-occupied Ukraine nung Arogotem mita oa timtem agütsür



Ukraine nung Russia nunger sepaitemi raksatsüba Tenla ki kar noksa nung angur.

February 03, 2026: Russia nunger ketdangsertemi anüdoklen Ukraine nung tekülem kitem mita oa tamangertem nem timtem agütsür; Russia nunger ozüing kübok malirtemi timtem kanga ajangshir.

January 25, 2026 nü Russia nunger police aser sepaitemi Krasnodon jila nung (Ukraine nunger Sorokyne ta ajar) Council of Churches Baptist Arogo indang Tenla ki ana mita oa liasü. Iba jila ya Ukraine kübok Luhansk region nung lir.

Sepaitem kar ket nung prangpong liasü, ta Arogo lenirtemi metetdaksü.

Pastor Vladimir Rytikov-i, tamangertem prayer hall nung tekülem sentong tagidak mapang nung Russia nunger sepaitem aru aser tamangertem nokdakdaksü, iba sülen maitsü ajak bendena liasü, ta metetdaksü.

Iba sülen pastor Rytikov police station-i anir ao aser Arogoi Russia nunger ozüing kübok register masüba atema amokmerena liasü.

"Parnoki onok dang, nenoki register mesüra tekülem sentong agiba shia parnok arua nokdangsü ta ashi," ta Pastor Rytikov-i metetdaksü.

Kasa anogo nungjisa anasa aliba Teple yimdak Baptist Arogo kata mita ao aser tekülem

sentong agiba nokdanga liasü.

Russia-i Ukraine nung atsünga agiba tesemtem nung mapang shia Russia nunger ketdangsertem aser sepaitemi timtem agütsür.

Yaküm July ita nungi December ita tashi nung Russia-i Ukraine kübok Donetsk aser Luhansk region na nung Tenla kitem aiben mita ogo. Item Arogo teimbaka Council of Churches Baptist Arogotem lir. Russia nunger "anti-missionary" ozüing kübokArogo nung lenir pongu dang senchi chiogo.

Akhidang nungi Council of Churches Baptists-i linük kecha nunga sorkar matsüngdang register masür. Russia nunger ketdangsertemi, register masüba Arogotemi tekülem sentong agibaji ozüing alema missionary mapa inyakba lir ta züingshir.

Iba ozüing nungji ajemdaker Russia nunger courts-ia Ukraine nung aliba pastor tem aika dang senchi chiogo.

Russian-occupied Ukraine territory nung yimsü temeden anema inyakba atema United Nations-i Russia aiben aitsüogo.

UN Human Rights Council, Secretary-General António Guterres-i sangdong ka ajanga, "Peii melungba yimsü benschia amangba atema ozüing kübok ken o mebenoktsüla mesüra pua

mayutsüla. Iba ya International meimchir temeden ozüing lir," ta metetdaksü.

"Ukraine nung khenpiga atsünga aliba tesemtem nung ajaki pei tekülem kidang sademsadema sarasadem agitettsüla aser tekülem agitettsüla," ta pai metetdaksü.

Center for European Policy Analysis (CEPA)-i, Ukraine nung Russia ketdangsertemi asüngdangyatsü atema anir aoba putirtem aser pastor tem hopta mesüra ita aika samaogo aser karbo pei aliba tesem nungi ajentsüsa aküm, ta metetdaksü.

CEPA nungi Mitzi Perdue aser Nicole Monette nati, "Tang Russian occupied Ukraine nung Arogo nung lenirtem anema inyakba ya rara ajanga lir," ta metetdaksü.

2026 küm tetenzüklen tashi nung occupied regions aika nung Arogotemi Russia nunger ozüing kübok register süogo saka ano aikati register asütsü memelunger.

Russia nunger ketdangsertemi talisa Ukraine nung Protestant, Catholic aser Orthodox Arogotem anema inyaker.

Russian occupied territories nung amokmeren ajanga tamangertem aikati sadem sadema tekülem sentong magiteter aser tarutsü atema tsüba bilemer.

ANOGO ABEN TSÜNGREM DEN

Kodang na asayar asayang

"Nisung kati pei kibong yimsüsütsü memetetra, pai koda Tsüngrem arogo achaayangtsü?" (1Tim 3:5).

Kinüngtsüi kidang sayutsüngir ka maginer saka kinüngbo, aser tanurtemi tesayur masü tebu aginer. Kibong nung mapang tajung indokang aser kidang mapa nung yaritepang- merük-mejuba, bazari aoba. Sayutsünger "tenzükbä mapa asoshi ni ozü kibong bendanga agütsür" ta ashi. Ibaji Lai tesayuba anema lir.

Na Khristan mapa liang mesüra alima mapa nung liang, nai iba ozüing mezüngbuba südaktsütsüla: Tsüngrem mezüngbuba, tanabuba kibong aser tesembuba mapa. Iba ozüing meyipsaba tetezü timtem. Peteri tebuttsü tetsü anebalur. Yisui pa sür nütsüngtem dang tetsü anepalutsü nungloksü.

Kibong nung sayisabong (games) alitsüla. Teti tamangba yimsü indang dang tejembi saka tanurtemi asayaba nung pelatepang. Külemi otsü atungtepa chiyongang. Kidang renemba chiyongtsü nung tashishi meli-i chiyongang.

Takoktsü dang süra kinungtsüa anir ne mapai (ministry) oog. Mapang talanglang kibong den pilaa malitsüla. Tangar tebut/tetsür den kinüngbo /kinüngtsü majung tejembi. "Teshisadangbai ne madak mittsü; tangatetbai na anüksü" (A.Shin 2:11).

Temangji Tsüngrem tenla ki aser ibai junga anebalutsüla (1Kor 3:16). Chiyongtsü shidak chiyongang aser tali achiajem tesü. Mapang shidak nung chiyongba aser anisüngzük tajung agibai nai küm tali tenzüktetsü. Takok tashi jajatsüla. Talungtsü nung dang senzütsü yimya tesüba. Küm 30 tashi Yisua sung mapa nung kanga mazüngi liasü aser küm 3 sür tesadang shi pai mazüngi jajaa liasü aser tenemi atu. Pai pa meyong kangki apu. Pai pa temang timi ayu. Shibai pa temang anemtsü.

Anisüngzük asoshi Tsüngrem tenüing sangang saka iba jagi temesepdaksü. Talang nung bilemstü aser tongmelang alitsübaji asenok tazüokba o asütsüla. Shi jabujari nungi jenang. Ibai ne temang anema lir (1Kor 6:18). Na mezüja shimtetba aser tashi samatsü. Mapang mapang temang tendangang aser yakta anebaluang (1Tim 5:23). Anema alitsü sarasademang (3Yn 2).

Pai Tsüngrem dang nangzük, "Ne telatet ozüngtem ni angazüktsüsa ni timtemdaksübaji ni atema tajung lir. Ni timtem agi metongi alidang, ni aibelena ao; saka tangbo ni ne o benshir" (T.Ken 119:71,67). Timtem arudang asen tebang mechi agi item otem mejembi alitsü akok. Saka kodang tesüiba timtemtem kodang asenoki bilemtetdir, asenoki mejungi bilemba dang nung aremzüka alitsü. Ibri shiti züluri item tatem maka otem asenok dangi zülu. "Temerenshi ajak atongba mapang nung tepelatsü masü, saka tejashitsü mesüker; aji saka tesülen, shiri aji agi azüoka arur parnok asoshi temeshiba tesünep tejang tangtsür" (Ibri 12:11).

Angazüktsü asoshi asenok class room nung tazüokba tesashi kübok tesayuba agüja küm aika sayur. Mapang kümzüksü aser temelaba asoshi temelenshi akar. Saka Tsüngrem asoshi, pa kodanga memelenshir aser kodanga aritepa masür. Mapangtem pa teka nung lir. Taküm lessontem manger mesangwadang mangazüker.

Kerala nung state sorkari nun tem nem old age pension agütsütsü

February 03, 2025: Kerala state sorkari Catholic nun tem nem-a social security pension agütsütsü telemtetba agiba atema Arogoi pelaba lemsatep.

Iba pension ya kibong mekümi alir tetsür arrshi küm 50 aser temapurtem nem agütsür.

January 28, 2026 nü Chief Minister Pinarayi Vijayan leniba nung cabinet senden amenba mapang nung state nung nun tem nem ita shia pension sen 1,600 agütsütsü lemtet.

Taküm April ita nung state

assembly election agitsü aser Vijayan-i aniba communist teloktep sorkari tang agi tasembenbuba takok angutsü nükjidong nung tokteptsü.

Hindu nunger tekülem kitem, monasteries aser ashram nung alir tetsürtem nem pension agütsür, ajisüaka nun tem bo kibong mekümi dang alitsü telemtetba agiba ajanga pension magütsüi liasü, ta sorkar ketdangser kati metetdaksü.

2021 küm July ita aser 2023 küm February ita nung cabinet senden amenba mapang nung

nun tem aser old-age homes nung alirtem nembo pension magütsütsü lemteta liasü.

Kerala Catholic Bishops' Council's Commission nung secretary, putir Michael Pulickal-i, "Nun tem nem pension magütsüi liasü, ajisüaka tang nungibo pension agütsütsü telemtetba agibaji onoki pelaa agizüker," ta metetdaksü.

January 30, 2026 nü osangbener den jembidang Carmelites of Mary Immaculate nung putir, Michael-i, "Onoki sorkar

ajurua parnok dang, loktiliba

tenzüker nun tem bendanga January 29 nü züingshiba ya anenang ta mepishia liasü," ta metetdaksü.

Paisa, Catholic nun tem-a kasa senso ama züingshitsüla, aser tang assembly election agitsü mapang ana nung lia parnok nem pension agütsütsü sangdong agütsüba ya mapa kümä shidak benshitsü imlar, ta metetdaksü.

Kerala Conference of Major Superiors nung tongti, Sister Ardra Kuzhinapurathu-ia, tamalen aibelenba tang sorkari metongshiba atema

pelar, ta metetdaksü.

Kuzhinapurathu-i sangdong ka ajanga, Khristan missionary temi nüburtem taküm jenjang tajungba kümdaktsütsü atema bendanga tenzüker; linük yangerba nung missionary temi mapa tajung inyakbaji shingaia 'nunga' ta meshitettsü, ta metetdaksü.

Nütsüng million 33 aliba Kerala state nung nütsüng shilem 18 Khristantem lir, nütsüng shilem 54 Hindu nungertem aser nütsüng shilem 27 Muslim nungertem lir.

AO OSHI ANGAZÜKDAK:**TANÜ ANGAZÜKTSÜBA OJANG****Tzüküm**

(n) tzüim aser ayong tezülen aliba ali tesem (bank, shore)

* Tzüim tzüküm nung rong anena ayur.

Tzüküpra

(n) tzü nung aliba küpra, amuk (water snail, type of mollusc)

* Akhi mapangbo asenoki tzüküpra machi.



Tir Yimyim

OLONG PAITEP # 7404

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzük asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidadong - 4
11. Tenük-telen mejungi aküm - 5
13. Terok nungi adokba - 3
14. Meimchir telemisa - 3

OLONG PAITEP # 7403 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala,
11. Semer, 13. Sen,
15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER

India tsür ultra-distance aser long-distance runner Sufiya Sufi-i Guinness World Records nungi official certificate agizükogo. Sufi-i ghonda 100 kübok Manali-Leh high-altitude run tembanga asemba atema iba otsü tasen yangluogo.

Sufi-i Manali nungi Leh tashi kilometer 470-480 shi jungnua asem aser iba tesem ya tzüym nungi 8,500 metres temalen asüba agi alima nung "toughest long-distance running routes" rongnung ka lir. Sufi-i ghonda 98 aser minute 27 nung asemzük.

Assam police-i taoba Congress lennir Anowar Hussain apu

Guwahati, February 3, 2026

(Agencies): Assam police-i taoba Congress lennir aser land broker Anowar Hussain puogo.

Guwahati yimti nung mita aodang Rs 1.5 crore jungnua cash aser cheques apu aser iba ken o dak sendakba nung Hussain apu.

Osang tejangja ka nung ajemdaker Basistha Police

Station nungi police telok kati mita aodang Hussain apu. Iba maparen nung Hussain densema nisung pezü pua lir.

Police-i parnok ket nungi Rs 50 lakh cash aser Rs 1 crore jungnua cheques puogo.

Hussain-i bank ajanga sen yoktsüba aodang len tom nung apu. Tang tashi nung bushisüngdang nungi osang

tejangja kecha mali saka financial network ka aliba ama ajiteter.

Anowar Hussain ya Lower Assam nung aser talisa Dhubri district nung tongtipang nisung ka lir. Pai yimtenren aser shishilembabaren inyaka arur. Pa ya taoba mapang Congress lennir ka liasü aser real estate o land brokerage sector nung tongti inyaker ka lir.

Taoba mapang nung Hussain ya ozüing alema inyaksangshiba ken o kar nung tai tonglokja liasü. Pa ya R.H. Khan den tesentaktep tajung aliba nisung ka lir. Assam nung multi-crore North Cachar Hills (now Dima Hasao) scam nung Khan dak tongti süa tai tonglokja lir.

Guwahati Police-i sen aruba aser cheques nung zülua beneficiaries jangjatsü atema par pezü dang dang asüngdangya südar.

NIA court-i Kukiland president Mark Haokip anema ken o benok

Imphal, February 3, 2026

(Agencies): National Investigation Agency (NIA) court nung Special Judge kati Government of People's Democratic Republic of Kukiland president Mark Thangmang Haokip anema ken o benokogo.

Arishi küm 40 tain Haokip 40 ya Churachandpur district kübok Molnom nungi Limkhosei Haokip'er jabaso lir. Pai India nungi balaka razüka aotsü tasa atong mesüra India sorkar anema rara mena ta tai tonglokja lir.

Unlawful Activities (Prevention) Act, 1967 nung

Section 13 aser Indian Penal Code nung Section 648 kübok pa anema ken o benokogo.

Okadaki February 9, 2026 nü pa temepishiba angadangsü anogo latetogo. Haokip ya video conferencing ajanga Special NIA court tsüngdangi anir arua liasü.

Haokip ya May 30, 2022 nü New Delhi kübok Kishangarh nung apu. Pai social media ajanga tesempatep adoktsü, tensa raksatsü aser Democratic Republic of Kukiland indang nükjidadongtem asoshi ozüing alema inyaksü ajungmesotsü merang ta tai tonglokja lir. Pa inyaksangshi ajanga

Manipur nung Meitei aser Kuki nunger tsüngda mepetmesü tuluba adokdaksü.

Haokip indang ket nungi diary ka anguba nung "Kukiland" tentetsü indang tasatem zülua lir. Iba nung India, Myanmar, aser Bangladesh nungi litsü densema lir ta charge sheet nung shia lir.

Ketdangsürtemisa Haokip ket nungi osettem apuba nung pa www.kukigovt.com ta ser website lapokba nunga shilem agiba ngueto. Iba ya "Kukiland" tentetsü tangatetba lemsateptsü aser India sorkar anema tasa atongsü atema lapokba liasü.

Arunachal kübok Tirap nung NSCN-K züingsem ka temai adok

Itanagar, February 3, 2026

(Agencies): February 3, 2026 nü Tirap district kübok NSCN-K (Niki Sumi) züingsem ka temai adokogo.

Army No. 23149 Lt. Wangjong Wangsu (37)-i Khonsa nung Superintendent of Police indang office nung pa sasa bendanga agütsü. Iba mapang Tirap Police, 44 Assam

Rifles aser CRPF 36 Battalion ketdangsürtem liasü.

Wangjong ya Jesan Wangsu'er jabaso lir aser pa ya Longding district kübok Longsom nung lir ta jangjaogo.

Iba ya Tirap aser temeket nung yimjung maparen inyakba nung tejakleni aoba mapa ka lir. Telungpurtemi pei sasa mulungteta temai adokba ajanga

ano mashileni anisaba lanurtemi prangpong toktsür bendanga agütsütsü ajungmesotsü akok ta security agencies-i ashir.

District administration den security forces-i nübertem dang Tirap aser temeket district tem nung yimjung, tensa süngjemtsü aser terenlok alitsü inyakba nung amalitepa yariteptsü ayongzükogo.

US den ken o jembitsü renema lir: Iran Tir Pezeshkian



Masoud Pezeshkian

Tehran, Tsüklai/February 03 (Agencies): US-i jembishinü akatsü asüngdangba langzüa region nung tembar sorkar tem nungi mepishiba sülen Iran-i US den jembishinütsü merangtsü, ta Iran Tir Masoud Pezeshkian-i ashi.

X nung sangdong ka agütsüba nung Pezeshkian-i Iran indang Minister of Foreign Affairs Abbas Araghchi dang amokmeren aser menüngdakba nung imlaba makai jembishinütsü shiogo, ta ashi.

Iran nung amakba ajanga region nung rara tenzüksü ta Iran Supreme Leader Ayatollah Ali Khamenei-i ashiba sülen linük tir nungi iba o ya adoker.

Iran indang nuclear mangdang aser longkak aiter azüdokshia azüokba mechi US Tir Donald Trump-i teka aitsü amokmerena anasa par sepaitem anidena lir.

"Item jembishinü ya asen linük tejangraba framework kübok alitsüla," ta Pezeshkian-i ashi.

Jembishinü ya Istanbul nung Holulbarnü alitsü, ta US media ajanga ashir.

Araghchi-i CNN den sensaksemba mapang onoki tezüngzüktep ka yanglutettsü ta temulung lema lir ta ashiba sülen Pezeshkian-i iba osang ya sangdong.

Hombarnü White House nung osangbener den jembidang, 'Asenoki langka inyaktetera aji tajung asütsü,

saka aji mesüra langka tamajung ataloktsü,' ta Trump-i shia liasü.

Taoba küm US-i Operation Midnight Hammer nüngja agütsür Iran indang nuclear facilities amak. Aji masüdang Israel-i Iran indang nuclear facilities aser nuclear scientists dak tenük yoker operation tulu agia liasü.

Trump-i rong tulutiba aser tajungtiba densema tashi tuluka Iran leni odar, ta shia liasü. Air craft carrier USS Abraham Lincoln densema US mitkar aser tzüym sepaitem Middle East anasa anidena lir.

Iran nung longkak aitba mapang nisung 3,117 tepset ta ketdangsür temi ashir, saka activist aser monitoring groups temi iba dang kanga agi timba asü ta ashir.

US nung aliba Human Rights Activists News Agency (HRANA) ajanga longkak aiter nisung 6,430 asüba jangjaogo ta ashir, aser yangji tanur 152 aser sorkar den sendaktepa aliba nisung 214 dena lir.

Norway nung aliba Iran Human Rights (IHR)-ibo tasüba 25,000 dak tema asütsü ta ashir.

Iran nung rongsenketzüng jenjang mejungi akumba ajanga longkak ait tenzüka saka meilongi yimsüsür melentsü khanga liasü.

Trump aser Colombia Tir Petro ajuruteptsü



Washington, Tsüklai/February 03 (Agencies): US Tir Donald Trump aser Colombia Tir Gustavo Petro na tang mezüngbuba White House nung Mongulbarnü ajuruteptsü.

Trump, shibai Latin America ajunga America nungeri amokbangtsü tejangraba lemsatepa aru, pa ita ishika Petro den tesendaktep khen jungle khen mejungli ta aru. Petro ya taoba mapang anti-imperialist guerrilla liasü aser Colombia indang tir ka ama 2022 küm shim.

October ita Trump-i Petro dang "illegal drug leader" ta aja saka kuli magütsü, aser January ita pai mapang talangka nungi tembar süa aruba linük nung mitkar-i mapa inyaksü jembia aser temesepba mozü shibelenba mazüokteter ta tai

tonglokja liasü.

Petro ya US tir kanga sashia anemer ka ama lia arur. Trump administration-i temesepba mozü bena lir ta tai tonglokja rong tem amakba ya 'war crimes' lir ta Petro-i ashi aser taoba ita US-i Venezuela lenir Nicolas Maduro atsüngdokba ya ozüng alema pua bener aoba lir ta shia liasü.

January ita lenir ana tsüngta phone ajanga jembia aser iba sülen Petro ya Washington-i jaok. Hombarnü osangbener den jembidang, Petro osü tang melenshiogo ta shia liasü.

"Onok senden tajung ka amentsü," ta Trump-i ashi.

Tena langka kar nung temulung ajemaka, tena yimya takzütsü makoker, o jembiba yimya kanga kera melenshir. Tir ana ya mapang kakabo

temulung temerang asür, anungji senden ka telemla ka masütsü, ta Colombia nunger osang ka ajanga ashi.

Mongulbarnü senden nung Colombia ketdangsür temi temesepba mozü anema nokdakba nung takok anguba, cocaine apuba indang tejangja lemsateptsü sentong lir ta ashir.

Colombia ya alima nung coca timtiba adokdaksüba linük ka lir, koba cocaine yangluba nung tongtipangtiba oset ka lir aser iba linük nungya US-i kiralongrar ta sangdonga alir aika jenoka lir.

Ajisüaka parnok ya region nung Washington indang tembar tajung ka ama arur, aser US nung ketdangsür balala den teka amteper north tsütsüi temesepba mozü aoba ajemdaksür.

Petro yimsüsüba kübok Colombia nung coca production timba kumogo.

Petro-i taoba hopta ang Colombian migrants tem dang Chile, Argentina aser Unites States nungi meyipa shilanga alar ama mezüngshidaksütsü ajungshia liasü. Paisa Miami dang nungi Havana nung aliba tajungba ta shia lir.

Colombia-i senden ya shinga mejaoki amentsü mepishi, saka Trump-i aiben mapangdong nung osangbener tem Oval Office telungi aitdaksür.

Russia-i Ukraine indang energy facility tem amak

Kyiv, Tsüklai/February 3 (Agencies): Yimjung atema sensaksemtsü anogo ka lia Russia-i drone noklang aika aser missile aika amshia Mongolbarnü Ukraine indang energy facility tem maka kanga dang temekong mapang kibong meyirejang aika nung heating facility makai kümdaksüogo.

Linük yimtiba Kyiv aser Ukraine nung yimti tulutiba rongnung tanabuba Kharkiv na manger mesangwa tsüngda makogo, aser Ukraine indang energy minister-i ashiba agi, Russia-i tesem ti tashi nung teraksatsüba bener arutsüogo.

Russia-i drone 450 aser missile 70 dak tema yok aser iba mapang apartment block ka nung nisung teku yiru aser energy infrastructure tema raksaja liasü, ta Ukraine nunger ketdangsürtemi ashi. Tesem aika nung electricity aser heating makai kümogo, kong temperature -20 Celsius (-4 Fahrenheit) tekübok lir.

"Diplomacy dangi meyiptsü melen Russia asoshi asükwa temekong anogotem maangka agia nüburtem amokmerentsüji tongtibangtiba lir," ta Ukraine tir Volodymyr Zelenskiy-i Telegram nung zülutsü.

Pai, Russia, Ukraine aser U.S nunger ketdangsürtem Abu

Dhabi nung Bodhbar aser Brehostibarnü sensaksemtsü aliba indang jembirba liasü.

January ita tatemlen sensaksem nung Moscow-i Ukraine anütoklen Ukraine indang tesem kar akhangba indang sensaksemogo, koba Kyiv-i memulungi liasü.

Yimjung atema onük balala benoker aliba agizüktsü atema Kyiv ya US-i nongshia arudar aser kasa mapang nung Russia-i Ukraine indang energy system tem amakba ya parnok bendanga agütsüdaksütsü asoshi ta angateter.


Russia-i amakba facility tem rongnung ki balalai yoktsü atema tzü moluba tesemtem densema liasü.

Kyiv kübok district pongu nung teraksatsüba adokogo, kong apartment block asem kindergarten ka amenoka aliba ki ka densema lir, ta yimti military administration tekolakba Tymur Tkachenko-i ashi.

Kharkiv nung Mayor Ihor Terekhov-i ashiba agi, Russia-i energy infrastructure dak tenük yoker amak aser iba ajanga ki 800 dak tema heat facility makai aküm.

Deputy Prime Minister Oleksiy Kuleba-i ashiba agi, Kharkiv nung ki 110,000 nung heating facility makai aküm.

Uruguay Tir Orsi-i China den tesendaktep akangshi



Beijing, Tsüklai/February 3 (Agencies): United States tir Donald Trump-i Latin America nung China nem mejugshidaksütsü asoshi tali nongshiba mapang ka nung China aser Uruguay nati linük ana tsüngda strategic partnership akangshitsü asoshi jenjang agiogo.

Uruguay tir Yamandu Orsi aser China tir Xi Jinping na Mongolbarnü Beijing nung ajurytepa senden amenba sülen linük ana yagi science, technology aser shishilemba balala dak sendakba nung tenangzüktepba aika yangluogo.

Orsi-i social media nung post ka ajanga ashiba agi, Uruguay alima kintem den sendaktepa inyaksü, mapang talangka asoshi tesendaktep yanglutsü aser linük terenlok atema maangka tasen adokdaksütsü atema merangdar.

Senden nung X-i, Uruguay nunger lenir dang ya arok terenlok atema inyakba mapang

"multipolar world & inclusive economic globalisation" ka ajungkettsü nüngdakba lemsatepa liasü.

Orsi tang anogo tenet atema China-i Deobarnü oa lir aser pa Beijing nungi Shanghai-i aotsü. Shishilemba tsütsü lenirtem aser tanga sorkar ketdangsürtem densema Uruguay nunger 150-i tir meina oa lir.

Pa ya US special forces-i Venezuela tir Nicolas Maduro pur aoba sülen China semdangba Latin American nunger lenir mezüngbuba lir.

Maduro apuba sülen Orsi-i, military tashi amshiba ya Uruguay-i aitsür ta ashi, saka mapang tatsüka lir pa aginba ya osang tajung kechiyong authoritarian yimsüsüba aginer democracy amenokogo ta ashi.

Ajisüaka Orsi-i China den tesendaktep yangluba ajanga Trump rongmesotsü akok, shibai Western Hemisphere tanaben azüokshitsü merangdar.

Liverpool-i defender Jacquet alizükogo



Tsüklai/February 3, 2026

(Agencies): Premier League transfer window tatabangbuba anogo Liverpool-i Rennes defender Jeremy Jacquet alizükogo. Kasa mapang nung Crystal Palace-ia Wolves striker Jorgen Strand Larsen alizükogo.

Osang ajanga ashiba agi, Liverpool-i Jacquet atema pound million 60 agütsütsü mulunga agizükogo. Ajisüaka arishi kum 20 tain asayar ya summer nungang Liverpool nung adentsü.

Jacquet ya iba ita tetenzüklen Chelsea-i aotsü atema sensaksema liasü, saka Chelsea nung asayar aika aliba ajanga pai monüi aküm. Kasa mapang nung Liverpool purbo centre-back agi anünga lir, kechiyong Joe Gomez aser Giovanni Leoni naprongla yirur lir.

French under-21 international asayar Jacquet ya Rennes nungi 31 ben

asayaago, saka Liverpool-i pa atema mezüng pound million 55 agütsütsü aser iba den bendenloksema ano add-ons pound million 5 agütsütsü.

January transfer window shibangsü lia Crystal Palace-ia club asoshi otsü tasen ka yanglua pound million 48 agi Norway nunger forward Strand Larsen alizükogo. Pa den kum pezü ser tesadang atema tenangzüktepba yangluogo. Mateta-i club toktsür aotsü akok ta bilema Palace puri Strand Larsen alizüktsü jenjang agia liasü.

Mateta ya AC Milan-i aotsü akok ta bilema Deobarnü Nottingham Forest dena masayadaksü, saka pa temekok yirur aliba agi tebilemtsü ka-a Hombarnü pa loan nung aotsü jembitepa aliba ya tokja liasü, ajisüaka Palace puri Larsen bosa anir arutsüsa aküm.

Maneni Wolves puri Strand Larsen melenä Southampton striker Adam Armstrong pound

million 7 agi alizükogo. Everton-ia Chelsea nungi arishi kum 19 tain winger Tyrique George season tatem tashi asayatsü asoshi loan nung aniogo.

Chelsea-i Mamadou Sarr Strasbourg nungi meyipa anir aruogo, shiba loan nung or liasü.

Manchester City midfielder Calvin Phillips, Championship side Sheffield United nung loan nung oa denogo. Phillips shiba England tenüng nungi tatemsa 2023 kum asaya liasü, pa taküm City nungi khien dang asaya liasü.

Tottenham-ia, Scottish Premiership leaders Hearts nungi arishi kum 18 tain James Wilson alizükogo aser Nottingham Forest-ia Borussia Monchengladbach left-back Luca Netz den kum pezü atema tenangzüktepba yangluogo. Sunderland-i Ecuador winger Nilson Angulo Anderlecht nungi pound million 17.5 agi alizükogo.

Under-13 ASMITA zonal football league Chümou nung asayatsü

Dimapur, Tsüklai/February 3 (TYO): Under-13 ASMITA Zonal Football League 2025-26 (East Zone) February 5 nü Chümoukedima Football Stadium nung 1:30 ako nungi tenzüka asayatsü.

Asayamung lapokba sentong nung Chümoukedima Deputy Commissioner, Polan John alakteta jaoker asütsü. Iba sentong ya Nagaland Football Association-i host asütsü.

Association Senior Vice-President, Kiyeka S. Sumi lenisüba nung agitsü.

Iba asayamung ya ASMITA aser Khelo India kübok ayongzükogo, koba grassroots football ajungkettsü aser tanur asayatem jangjatsü nükjidong nung ayonga asayar. Iba asayamung ya Nagaland Football Association-i host asütsü.

Alcaraz Rotterdam Open nung masayatsü



Tsüklai/February 3, 2026

(Agencies): Carlos Alcaraz-i Rotterdam nung ABN AMRO Open nung pa indang title defend masütsü. Asayamung ayongertemi pai iba asayamung nung shilem magitsü telemteba agiba social media ajanga Hombarnü metetdaksüogo.

Spain nunger asayar, shibai taoba season iba ATP 500 trophy ya koka liasü, pai February 9 nungi 16 tashi asayatsü aliba iba indoor hard-court asayamung nung masayai temang anepalutsü telemteba agiogo.

Australian Open nung otsü tasen ka yaglua sülen anogo ishika lir Alcaraz-i iba telemteba agia liasü. Arishi kum 22 tain asayar yagi final nung Novak Djokovic koka Australia Open mezüngbuba akok aser pa ya Grand Slam pezüprongla akokba asayar tanobusang aküm.

Australia nunga hopta ka ana kanga belema asayaba sülen Alcaraz aser par team-i mapang tatsüka anisüngzüksü nüngdaker ta angateta iba telemteba agiogo.

World No.1 asayar ya ita tatemlen Doha nung ATP 500 event nung asayatsü imlar.

anepalua arudar aser kanga belema asayaba sülen anisüngzüksüji kanga tongtumbang kumogo.

Alcaraz-i iba asayamung nung masayatsü telemteba agiba tetezü pai taoba kum Rotterdam nung takok anguba mapang anguba ATP ranking points 500 magi akümtsü. Taoba kum pai iba asayamung final nung Alex de Minaur 6-4, 3-6, 6-2 agi koka mezüngbuba indoor hard-court title bena liasü.

Ajisüaka pai Australian Open nung point aika anguba aser Jannik Sinner semi-finals nung tsukatokba ajanga point akoksaba yagi pa rankings dak kangabo mekongshir.

Pa Indian Wells aser Italian Open densema asayamung tulutem nung asayatsü atema rangloker inyakba mapang par team-i pa takok tashi anema toktsütsü jenjang agidar.

Rotterdam nung top 10 asayar Alexander Zverev, Felix Auger-Aliassime aser Alex de Minaur nunger asayaba angutsü.

Spain nunger asayar ya ita tatemlen Doha nung ATP 500 event nung asayatsü imlar.

ICC-i PCB nem tekümdangtsü metetdaksü



Tsüklai/February 3, 2026

(Agencies): February 15 nü India den masayara T20 World Cup official broadcasters JioStar-i okadak ken o benoktsü akok ta ICC-i Pakistan Cricket Board (PCB) nem tekümdangtsü metetdaksüogo, ta PCB source kati Mongolbarnü ashi.

Sorkari India den masayatsü tetuyuba agütsüba sülen Pakistan-i iba telemteba agi, ajisüaka PCB-i iba telemteba ya kechiba agi iba indang ICC nem memetetdaksüi lir.

PTI-i taoba mapang sangdongba ama ICC-i Pakistan indang annual revenue share ajunga sota ayutsü (USD

million 35) aser iba sen ya broadcaster tem nem agütsütsü akok.

PCB source temi ashiba agi, mendenbuba Mohsin Naqvi-i taoba hopta board indang legal team den sensak asema sülen Ato Kilonser Shehbaz Sharif nem osang agütsüogo, saka ketdangsurtem takoksa tulu asoshi renemdar.

"Pakistan-i India den masayatsü telemteba agira parnok rongsenketzung dak sendakba nung merenshitsü, broadcaster temi okadaki anir aotsü akok aser ICC Dispute Resolution Committee (DRC) dangia ken o bener motettsü," ta PCB source kati PTI dang ashi.

"Sorkari India den masayatsü tetuyuba agüjaka PCB timtem ajangshitsü, kechiyong parnok asaya ajak parnok aginüba ama India nung masü saka neutral venue (Sri Lanka) ka nung asayatsü," ta ano PCB source kati ashi.

"Tanabuba nung India sorkari par team nem Pakistan nung asayatsü atema temelaba magütsü, saka Asia Cup mesüra ICC asayamungtem nung Pakistan den neutral venue tem nung asayatsü atemabo tenokdangba magütsü," ta board source yagisa shisem.

Contract indang jembiba mapang source kati ashiba agi, "ICC asayamung ajak atema ICC-i broadcaster den kum pezü atema tenangzüktepba yanglua mapang contract nung Pakistan aser India na asaya dena lir aser iba dak ajemdaker broadcaster-i ICC nem taah agütsüogo."

"Anungji contract nung aibelenba atema PCB aser ICC na okdaki anir aotsü asoshi broadcaster temeden lir," ta source yagisa shisem.

BILEMDANGANG

"Nai chinüba chia litettsü atema kümdanga chiajemang."